



## STINAPA TA INFORMA

Norteñonan ku amor pa Rincon

Zula Melaan a traha fo'i yòn den negoshi di su tata. Tambe despues ku su kasá a tuma e negoshi over: e konosido 'Bo Toko' na Nort'i Saliña. E mama i wela aki ta tende masha hopi elogio di turistanan pa nos naturalesa. Pa añanan largu e tabata lanta tur djadumingu i bai ku su kasá i yunan den kualke mondi. Nan tabata buska un palu fresku i sinta piknik. I awor ku nan tin mas tempu liber, e i su kasá ta bai 2 pa 3 biaha pa siman Rincon i besindario. Djis pa keiru i gosa intensamente di e naturalesa. "Nos ta asina tantu biaha na Rincon ku hendenan ta puntra nos si ta kas nos ta buska pa kumpra," Zula ta konta hariendo. Zula no sa unda e kuminsá ku ekspresá su amor i apresio pa e parti nort di Bonaire. Tantu pa e pueblo di Rincon i nan kultura tan outéntiko, pero sigur tambe pa tur e naturalesa ku ta rondon'é. Su asombro i apresio pa e bunitesa en realidat ta kuminsa fo'i 'Toeristenweg' kaba: e formannan di e barankanan, e diferente koló di blou ku e laman tin. Di kla te skur. "Wak ki ta kreashon di Dios!" Zula ta ekspresá ku admirashon. Ora nan yega Gotomeer, e ku su kasá ta sinta oranan largu i disfrutá di e paisahe. Zula ta masha konsiente ku naturalesa boneriano ta e 'motor bèrdè' di nos ekonomia. Ya ku e entrada mas grandi di Boneiru ta bin di turismo. E mes ta topa diariamente ku turistanan. Tin un grupo di turista brazileño ku a bira kasi ruman di nan. E brasileñonan tin ku biaha masha largu mes promé ku nan por yega Boneiru. I nan tin ku paga asina tantu. Asina mes nan ta keda bin regularmente. Zula ta sigui konta ku e brazileñonan ta bisa ku nos ta privilegiá di ta biba 'den porta di laman' i ku nos komo boneriano tin ku apresia e bunitesa. Pero asina mes nan ta lamentá ku Boneiru a kuminsá desaroyá ku e edifisionan haltu kantu di kosta. Pa futuro Zula ta di opinion ku mester konsientisá e hubentut tokante naturalesa fo'i skol di lushi kaba. Tambe mester bini mas publikashonnan pa sigui konsientisá pueblo pa promové desaroyo sin sakrifiká nos naturalesa, e ta konkluí ku un kara yen di speransa.

*Skirbí pa Natalie Wanga.*

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURALESA



**Traha huntu na un desaroyo duradero pa Boneiru**